


馬評外科症治全集

前



是書吳下名人手校於
別本不同每部實

馬培之先生評
外科症治全生

埽葉山房發兌

光緒甲申冬
月刊於吳門

是編乃林屋山人出其家傳枕中祕不爲自私自利之謀而亟亟焉以濟人爲急務嘔出心肝盡情昭揭以陰陽辨癰疽之別以赤白明陰陽之著實能補古方書所未逮其詞簡其法易雖不明醫者亦開卷瞭然於心自也往歲余患骨槽風醫家投散風清火之品幾至危殆得是編如法治之乃瘥余頗信之厥後凡親友間遇有病瘰癧痰核流注背疽及一切陰發重症各告以照方施治無不立效余益信之乃者胡氏外孫女左股痛足不着地年餘矣旣覺所苦處漫腫堅硬而皮色如故是

編所謂貼骨疽無疑也亦照方投以煎劑丸散不百日而潰且斂矣余惟信之深而尤欲人共信之獨惜坊本率多亥豕之誤方謀訂正重刑廣爲流佈外孫女欣然解囊金授余而請之適王君荆門曾有勘定本極精審遂付剞劂氏凡人有所樂爲皆根諸心而其心之一於公者世不槩見林屋山人是編之著可謂公之至矣今復以王君善校本行世俾覩是編者人人知醫豈不大快事乎哉外孫女年未及笄聰慧知書余嘉其信道之篤好善之誠因識刊刻顛末畧書數語於簡端道光

辛丑六月子仁氏黃鉉序

林屋山人憫人之混稱癰疽不知癰之與疽治法大相懸殊此辨晰癰是癰疽是疽於古方書未備而獨得之視摸者一一出方濟世不使後人以訛傳訛千古竟同長夜非謂是書一出諸方書可盡廢也凡與世醫治法無有異同者不載古方書具在可徧觀而博取焉惟讀者好學深思心知其意爾子仁氏九月朔又識

余自幼聞癰疽有不可治之症名曰陰發五六歲時舅
氏子京先生以骨槽風叵問之長老云久則成癆瘵也
甲午歲子仁文患骨槽風始甚劇後案外科症治全生
法治輒愈余取其書觀之乃知陽爲癰陰爲疽骨槽風
亦陰疽類非由瘵發由發後服涼藥延久成瘵耳世人
知陰發之名而不達陰發之治良可慨也適秦君立甫
元其家藏別本余因據以參校互有得失其字之顯譌
者改正之間有改而意仍未明及疑者有疑而未改者
如大癰潰後治法兩本竝云體虛年老者投參芪草皆

灸也夫托毒忌灸上已詳之而此忽云灸蓋承上痛息
毒散腫退色轉紅活而言卽體虛年老者亦必至是而
後可用灸斷斷不可早用今改云體虛年老者始投參
芪草更用灸勿仍誤謂虛者初起卽當用灸也癰瘰治
法第四條云卽在手下之腳骨別本云卽在手下突出
之骨腳骨足附外高骨也突出之骨掌後銳骨也患繫
喉間手爲近故從別本然足陽明脈亦循喉龍下循膈
外廉下足附拔疔散六和散兩方竝有瓜蝎而他方或
作瓜蝎或作血蝎攷方書有作瓜兒血蝎者知此蝎爲

竭誤第如雄黃之名腰黃後集申之瓜竭則無文本草
亦無瓜竭之名今竝改血竭輕粉無毒而於黃連則云
解輕粉毒文歧出攷本草亦云無毒而注云有毒黃連
解今改無爲有庶免眩惑牛膝治莖痛莖別本或改脛
按莖中痛水道中痛也第曰莖似非莖中矣而本草主
治列莖中痛此其脫中字乎癰疽方訣歸苓花粉節煎
或麻黃青蒿甘草皆有用節者此其甘草節乎鎖喉方
藥訣甘草各一錢別本作二錢本草當歸全者活血而
是書云定血此俱未敢臆斷表弟時清甫於吳門買是

書卽立甫所藏本清甫又於書肆舊書中見是書與吳門所買本異欲買之以示余則卽子仁先生藏本也重刻者不外此二本輾轉淆訛益不足據矣原本刻於乾隆五年子仁先生藏本則重刻於嘉慶五年立甫藏本不知其刻於何年是書流傳已百餘年而瘍醫都若未見何哉胡氏孤女所患久治不效案是書法治乃效旣效欲刻余所校本以廣其傳爰更取二本嚴勘付梓而序其始末并識其疑以質世之精於醫者道光二十有一年辛丑七月朔日王浩荆門氏譔

明劉誠意伯言藥不對症枉死者多余曾祖若谷公祔
集云癰疽無一死症而諸書所載患生何處病屬何經
故治乳岩而用羚羊犀角治橫痃而用生地防已治瘰
癧惡核而用夏枯連翹槩不論陰虛陽實惟以引經藥
倍以致乳岩橫痃成功不救瘰癧惡核潰久成怯全不
悔經引之藥誤反誘言白疽百人百可到泉鄉夫紅癰
乃陽實之症氣血熱而毒滯白疽乃陰虛之症氣血寒
而毒凝二者以開腠裏爲要腠裏開紅癰解毒止痛卽
消白疽解寒化凝立愈若憑經而失症治者藥之對經

而實背症也世之患陰疽而斃命者豈乏人乎如以陰
虛陽實別治癰疽無死症之語確矣余曾祖畱心此道
以臨危救活之方大患初起立消之藥一一筆之於書
爲傳家珍寶余幼讀之與世諸書治法迥別歷症四十
餘年臨危者救之初起者消之疼痛癢極者止之潰爛
不堪者斂之百治百靈萬無一失因思癰疽憑經竝治
久遍天下分別陰陽兩治惟余一家且余之治止於村
境若遍通邑分身無術偶聞枉死無不痛惜特以祖遺
之祕自己臨症并藥到病愈之方精製藥石之法和盤

托出盡登是集并序而梓之以質諸世之畱心救人者
依方修合依法法製依症用藥庶免枉死使天下後世
知癰疽果無死症云爾

崑

乾隆五年歲在庚申仲春朔日林屋王維德洪緒氏書

原書凡例

一癰與疽之治。截然兩途。世人以癰疽連呼竝治。夫癰疽二字之連呼。卽夫妻二字之連呼也。若以癰藥治疽。猶以安胎之藥服其夫矣。是集以癰疽分別兩治。皆執症執方之治法。如照法法製。照症用藥。救人之功。余不敢分。害人之罪。余當獨認。情願萬劫披毛。甘受屠家誅戮。

一輯是集。專論陰虛陽實。認定紅白兩色。是癰是疽。治卽全愈。所載諸方。皆藥到病愈。切勿增減。并重貴之藥。

少分逐症治法。開卷一目了然。不必投師。人人可精此道。

一諸書惟馮氏錦囊內。附陰疽論。與余家遺祕相符。獨無消疽之方。惟以溫補兼托爲法。且疽初起。卽如平場。安可用托。托則成功。余家之治。以消爲貴。以托爲畏。卽流注癰癤惡核。倘有潰者。仍不敢托。托則潰者雖斂。增出者又如何耶。故以消爲貴也。

一外科之虛實。發現在患。治患之法。集中細詳。不諳脈息。儘可救人。故痘症之險。悶順逆。眼科之心肝脾肺腎。

皆現於外。故亦不證脈也。好學者察患色則知症。照症治無不痊。

一醫可寄生死。閱坊刻外科。妄稱正宗。載云症現七惡。卽死。又載以桐油燒紅衣針。針入痰塊半寸。用降藥爲條。插入針孔。七日塊自開裂。再以條插七日。其核自落。又稱毒在皮裏肉內。刀割深要寸許。方能洩毒。殊不知毒在皮裏膜外。或應開刀。尙忌深過三分。恐傷內膜。若深入寸許。傷透內腑。病人何能堪此極刑。七惡之現。頃刻世之宗其法治。盡屬創徒。此集惟疔用刺。其外概不

輕用刀針。并禁昇降痛爛二藥。

一徧身患止有紅白兩色。紅者癰。白者疽。癰疽卽其名也。有謂無名腫毒者。因未識症而云。

一是書無論背項腰腹。色白者言疽。以疽藥愈之。紅腫者言癰。以癰藥愈之。坊刻書稱以某藥與服不應。再易某藥。豈非以人試藥乎。倘患生要緊穴道。安可遭醫幾試。望高明詳之。

一世無爛久之癰。惟疽初起失消。或遭降灸針割。以致年久不斂。治之方藥。集中細詳。